

明名臣言行錄

明名臣言行錄卷第六十二

都督劉公顯

字草堂南昌人

嘉靖三十六年夏四月倭寇揚及淮殘啄州縣十有三
殺都指揮一所過鞠市爲墟暴骨如莽我圉孔棘留
京戒嚴時公方北下將祗役金山大司馬張檄公守
浦口無何白司馬曰賊性貪怵輸掠旣衆其欲已盈
必無南今去者半其在泗州者需亦去耳不如擊之
顯留此不能自效也大司馬許之會御史馬移書辟
公公乘傳謁御史御史喜命具饗饗公公曰賊在顯

不咽食也請爲君滅賊還饗耳五月乙卯與其家用
驅至安東謀之賊艘二十九賊衆時脅從散去簡人
人倭也遣公謾書公笑曰賊素易我且歸則志情可
斃而待也廼伏甲岡下躬率四騎薄賊艘詬之賊出
公叱三騎使前以身殿斬一人以徇且戰且却射馬
中矢馬駭公下馬挾簇賊卒馳公前公躍馬斬馳者
賊至岡下弩發賊多中弩者然且扶傷而鬪甲亦殊
死戰賊乃引去甲欲逐之公曰日旰矣勿逐也賊言
焚民廬以摧我公卽先自焚賊縱所俘美女子以蠱
我公戒毋犯悉縛送有司公度夜當雨謂甲曰我露

宿是彼以逸待我也乃違岡十五里而軍選人持火
器潛涉賊艘賊數驚徹夜不得寢厥明丙辰援桴誓
衆公執一幟以號於衆曰汝官軍有能敢勇殺賊樹
功勲者立此幟下得三百人曰我前拒汝爲後勁命
甲四十人塞隘巷之衝每巷以五人守以五人巡曰
賊出汝蹈命甲六十人分四部伏岡下曰賊潰汝擊
命三巨艦積葦泊上流曰賊艘汝燔右之虛營以張
其勢左之疑兵以分其黨復令數人升屋而譟曰獲
賊矣獲賊矣旣誓乃陣賊自巷出者連斬四五人遂
不敢復出退語其魁魁怒摘冠揮衽左手持刀右手

持扇登岸麾賊衆蟻轉矢集如雨公單騎遇之格者半輟者半矢盡又張其銳圍公數圍弗克公射賊輒殪賊氣稍奪公曰彼衆我寡不先殲其魁則衆不携也迺一呼突賊壘斬前隊二人直擣鼓下所指麾者自頂至踵裂其尸出賊陣後賊衆披靡相怖以目甲四起夾擊之斬獲甚衆賊大潰還奔舟舟焚公追至舟上盡斬之又擒一魁名五王者亦斬之溺水死者不可殫計淮倭悉平

公不胄不介着一白布单衣巾褲亦如之身不滿七尺猶夫眇小丈夫耳及遇敵提兩刀騰躍超踴矯捷若

飛刀起見刀不見身淮民自河上觀者咸咄咄曰神
人嘗平九流橫江白草松盤芒佈等洞以三百騎破
獠萬人孤身被圍轉戰三日夜斬獠繫馬首潰圍而
出守蜀十年身經百戰不一鋤性闊疏無世俗脂韋
態以是多不悅於人云子綖自有傳

都督俞武襄公大猷

字志輔別號虛江其先鳳陽人世爲泉州百戶嘉靖乙未武闈進士累官後軍都督府都督同知贈左都督追謚武襄

生而穎異過人長而慷慨以豪傑自命折節讀書無所不聞從泉中王宣林福趙本學授易而本學能卽易衍兵嘗謂兵法之數起五猶一人之身有五體雖將百萬之兵可使合爲一人也

嘉靖乙未會舉第五除正千戶守禦金門用儒飭治讀法賑饑器俗爲之一變時海寇乘風遊劫上書部使

者呵辱之曰若武人何以書爲杖之奪官公笑曰此豈吾自見地耶遂盡鬻其家遊京師以書干毛尚書伯溫翟侍郎鑾謂鹵今日敢爲猖獗者蓋自太宗北伐而後未聞用大陣勝之今當以節制之師合爲一大陣破之則莫如辨馬步以定長技教技藝以倡勇敢重正兵以防衝突幸當天下全盛而兵寡食乏非所慮也書入面對公折其素號強兵者爲弱號堅營者爲虛不卑意毀見以求合也翟公壯其言而不能

用
擢守備汀漳遷廣東都司會安南叛人入欽廉爲寇諸

司議募陸兵公曰賊由海來獨當以海舟破之若專
備於陸賊舍此擊彼我不勝其備賊不勝其擊彼逸
我勞非計也乃多集海舟以擊之連破之永安萬寧
而安南函賊首以獻亡何瓊黎叛乘勝勦平之單車
入山與黎約黎人爭持牛肉來勞圖像佛祠稱爲喻
佛而禱焉則上交黎善後二策於兩廣巡撫歐陽必
進其平交策請度華彛界地置重兵委大將永鎮之
交南永安新安諸州皆揖大海城中有左右二水左
水通海交若有變當用海舟征之國初征交從陸險
遠所以取敗從海征之舟船無所不登岸兵糧無所

不乘載交人有糜折逃遁而已蓋漢征南越用伏波樓船二將軍馬援征徼側徼貳皆從海道此古法也其平黎策謂天下之物以羣而分則不爭天下之勢以重馭輕則不逆若各州縣土官其在千百年之前流毒肆害何啻今黎惟古人就其中力大智雄者使爲世官以類相統故天下雖亂土民無生異心土官雖弱其宗人相謀則有之未有土官逐主而篡之者也何也以羣而分則不爭也土官有官有印有府州若縣之名一方大柄握於一人內甲陳百千精銳之兵外村聯千萬應援之衆故雖甚不道其下敢怨而

不敢怒寧就死不敢變也何也以重馭輕則不逆也
今約黎土舍伯仲之間耳服則馴不服則聚而殺之
亦何怪焉請於聽撫之黎擇其力大勢雄者上聞朝
廷授官給印置城立縣一如土官彼其城高池深宮
室之廣財利之富妻妾之盛世代之榮必圖自全之
計萬一有生異心據城以叛雖強如岑猛窘迫之日
亦必背棄誅一人而別立之其亂亦易平也必進不
能用

倭難作公以南直隸副總兵戰賊平望王江涇六金壩
皆連捷而提督尚書張經以視師趙文華言論死公

坐落職奪祖官於是東南之禍日亟復浙直鎮守而
公言防江必先防海水兵急於陸兵蓋倭奴長陸戰
令樓船高大集萬銳其上倭船遇之輒摧壓焦爛固
我兵所長也善戰者毋以短擊長而以長制短且海
戰無他法在知風候齊號令以大舟勝小以多勝寡
耳於是用舟師戰而舟山積歲不除之賊皆勦

盜王直者徽人也以亡命入海勾倭彝貿易爲逋逃在
天子以連歲倭變皆直故責督府胡宗憲必得之公
言直在彼國一通逃夫耳倭之來不來非關直誅不
誅也若誘之來而殺之則失信且何以示後蓋請諸

宗憲不聽誘以來天子聞得直大喜詔殺直於是宗憲恚失信怏怏曰吾爲俞帥笑矣而羣倭聞殺直焚舟殊死戰大創入掠閩宗憲懼乃奏言公違節制不窮追爲解而公逮詔獄錦衣帥陸炳爲公行金嚴其蕃所而大學士階亦爲保持得發大同立功自贖至則與總督李文論胡馬利在衝突而中國靜以制之莫如車於是議制兵車獨木爲輪用人推挽翼以步卒佐以遊騎庚申卒與鹵遇安銀堡以所練兵車百輛步騎三千縱擊鹵萬計文因以其制聞於朝置兵車營自此始也

湖廣鎮筭苗起巡撫都御史黃光昇言大猷用兵如神臣在廣東時見其平安南叛臣筭無遺策始發之日廉州太守問賊何時平大猷曰後四旬見公於此已而果然有才如此置之散地乞補臣所部裨將楚中諸苗皆大猷昔時調遣從征伐者令其當事必有以威撫之詔以爲鎮筭叅將

饒平民張璉反流陷江閩諸州縣詔諸道合師二十萬討之而公遷南贛將時胡宗憲已奉詔兼督江廣聞璉出行剽下檄言賊棄巢出此自投死其速擊公前以違節制見効幾得罪欲言恐禍及欲不言恐敗事

已乃曰吾豈以一身之禍忘國事哉乃具言璉雖離巢出劫其妻子財寶乃在巢若我以大軍迫其巢彼必聚衆自救譬之虎方逐鹿熊據穴而搏其子虎安得不置鹿而還還而蹙之如拉朽矣且三省會擊有期又豈可以數萬之師從一夫團走哉於是引兵萬五千人疾走栢嵩嶺蹙璉巢賊果歸保巢而公出擊俘斬者千餘於是潛使說璉黨執璉已爲兩廣帥所奪或請訟之公曰賊惡其不滅豈必在已翌日班師不殺一人以示信

陞副總兵命制江湖閩廣四道會倭陷興化公自願晝

夜馳赴之駐秀山都督劉顯駐明山而都督戚繼光提浙兵未至上怒督府失泉城責戰急而閩士夫又洶洶急功公念賊且萬人能戰入死地官軍數僅相當若迫城而攻之彼實我虛彼飽我饑彼逸我勞若挫而東南之事去矣且敵以戰爲守我以守爲攻不若列營以困之於是星布兵營畫地鑿溝令東西通而列柵其上賊挑戰不動閩士夫訟共訴病之已竟殲賊諸將各加秩而公止賜金幣

倭三萬寇潮州與盜吳平相犄角爲廣忠詔移鎮潮廣羣盜憚公名競出降吳平雖不能堅決然亦詭殺倭

自效遂與倭人絕於是公請於督府吳桂芳曰賊以出邊爲生路山賊以歸巢爲生路今潮兵驅賊入益深則益以鬪耳是死路也當大集精兵十圍五攻無使片甲得還於是將漳兵二萬以來果破平而御史以招吳平爲公負坐免官都御史爲之抗言於朝乃得留

二源山袤千里賊據峒如蜂房木窩介三郡六縣之間而雲溪尤固公曰此當誘而聚之者也遣王鸞者盛騶從充裨將爲死間賊得鸞自安而公日發兵擊旁諸巢之未下者以趣之諸巢果畢聚雲溪以緩討乃

陽言誅李明過雲溪巢賊出牛酒犒兵須臾兵悉集
擊破之於是賞先登酬死間而東峒遂平桂芳上其
功云董五哨十萬之全師如奕棋着着先手剪三郡
六縣之妖逆如振落次次剗平以爲方叔元老之猷
云

譚侍郎綸貽公書曰節制精明公不如綸信賞必罰公
不如戚精悍馳騁公不如劉然此皆小知而公堪太
受公誠如霍大將軍任如諸葛丞相大如郭汾陽忠
似文信國毅似于肅愍可以托孤寄命則公之大受
然也及綸卒嘆曰無同吾志者矣乞歸休亦尋卒

平生蒞官誓衆陳師鞠旅一決於理雖支干孤虛雲物
氛祲堪輿奇遁兵家以爲務者未嘗一訖焉其推獎
士類如歐陽深鄧城湯克寬陳第有國士之風薦挽
不遺餘力城克寬坐繫以身保任之其後皆至總兵
而歐陽深以秀才納級爲指揮結客募士死興化之
難第先爲秀才公一見事功許之薦引武途官至游
擊將軍所著書有正氣堂集及伍法劒經射法戰車
續武經總要百餘卷皆傳於世

少保戚武莊公繼光

字元敬號孟諸定遠人世襲指揮僉事官至左都督加少保兼太子太保追謚武莊

幼而捭闔多權奇隆準方願穀而鷹揚英氣勃勃旣舞象折節爲儒以經術著旣冠奉父命上勲府襲世官待次司馬門

庚戌待試武闈匈奴大入部列城守簡材官戌九門公條上便宜部當其議山東歲遣治兵使者部六郡良家子入戌公任中軍務輯衆心一軍皆服

進備倭都司尋轉浙江都司僉書會倭難甚上練兵議

其略曰無兵而議戰亦猶人無臂而格于將乃冷焉
合者不張徵調者不戢吾不知其可也聞義烏人其
氣敵愾其習慄而自輕宜可鼓舞及今簡練訓習一
旅可當三軍督府乃檄公亟募三千人假以節制乃
間長短兵夾振而進隊立一人爲長偏則伍之倍則
什之犄角互張攻距擊刺互用是名鴛鴦陣居無何
卒服習矣督府請補浙東叅將分部台州辛酉島倭
入台州睹旌旗皆辟易所嚮以全取勝其年江西告
急督府檄公西行旣捷露布以聞軍聲益振

時閩寇張甚分壘爲三窟一據橫嶼一據牛田其酋長

壁莆東南出沒焚掠山寇陸梁海寇盤踞廣叛兵乘
亂出入眈若無人公以督府命部兵八千往自橫興
趨牛田俘馘立盡他彙部繼至截先登者五之三其
二突圍南奔窮追絕跡勒功平遠臺甫班師寇入莆
城又三宿驛聞督府逮京師大司馬趙公代督府乃
發浙餉屬募精兵萬人兼程入閩至則直趨平海部
勒士卒鷄鳴蓐食晨壓賊營破之倉卒大亂刺真倭
二千三百餘級一時狐豕雖洗無遺

公以春月至崇武所城民方下田倭驟登岸公出兵逆
之裨將請待兵稍集乃出擊寬片餉耳公曰春月農

郊婦子在田令倭得殺良民一人卽盡數斬之何足贖失必立往竟勝之

公在軍中選部將數人類已者衣裝竝如其自身出入莫別識夜亦不知其宿處有同官密令其卒亂入公卒中意欲盜取其首級而公故令士囊五色煙囊中獲首級煙塗之同官卒無有也遂不得首級

隆慶初鹵陷石州東薄昌黎幾不守用廷臣議召譚司馬戚繼戎入策備邊公上書備陳七原六失四弊大較言兵制西北什部東南鹵馮積威劫邊人邊人望風而靡戰將率腴軍費參外舍兒視鹵飽歸尾而勦

掩老羸爲功級旣贖而賞有差刳殯首以當雄飛彼
自以爲得計借曰當戰鮮不唾之且不練何以議兵
無兵何以議戰練兵之效嘗試之東南請簡部將若
而人分出三輔州縣部募三千丁壯部將將之合爲
四營營各五部每營立一裨將爲之連衡總攬折衝
則主將專制簡練訓習一如東南比及三年堂堂乎
可格鹵矣長驅出塞務令咋指而避窮廬迨其非時
則大舉討罪之師逐北而虛大漠然後屯田足餉罷
戍銷兵坐致富強則百世之利也部持可否未決
譚襄敏出就督府命公督練四主將兵節制視督府同

筴者謂太阿之柄不宜假武人於是以總理專任薊門卽不易銜而練兵之議寢矣復上言薊當肩胛幸而任臣臣無多言在薊言薊塞上周垣二千里一瑕則百堅皆瑕比年遞修滋費無益請更版築諸戌土畫地受工跨墻爲臺睥睨四達臺高五丈虛中爲三層臺宿百夫械器候糧俱在鹵至則當睥以守退則番休第力詘未能舉羸先築千二百座薊人多木疆律之軍正將不堪請募南中入彀者一軍以倡勇敢督府上其議許之始募南兵三千如期至陳而待命郊外自朝日雨甚至於日中軍容益莊總干山立邊

將大駭將軍令固如是乎既相要害程功能部署臺垣之役工力籍班軍則以南兵爲渠長薪木取諸塞外其餘則以益樵蘇最賞決罰有差不旬月告成事是役也在縣官僅發十萬緡經費考工足當百二十萬復增募南兵二萬編伍戍之

議立車營出戰則以代城郭車四面結勒爲方陣步騎二旅中藏之遇鹵乘陴火器先薄五百步外稍近則部兵出轅下距鹵馬排擊之鹵却而奔則縱騎兵乘勝逐北慮師不宿飽復益輜重營以從有發則南兵當選鋒入衛兵筴應主兵戍守踐更者任轉輸首分

數次刑名次技擊次步代次偵選次嚮導次批擣次
遮擊次追襲次俘馘次首功軍政畢張無不以律比
年東鹵謀入犯西酋得薊狀遂款關入貢部言鹵數
苦薊比修內備不戰而伐鹵謀卽軍正無所課功其
功上上再論功最進中軍署都督同知充總兵入薊
擁總理虛名秩如故

江陵當國上遣右司馬出行邊於時大閱薊門十六萬
之師畢至營伍必整旌旗火鼓必齊約束必堅號令
賞罰必信右司馬躬入諸營驗諸械器履諸關隘登
諸臺垣歷諸亭障周覽諸閭閻比還報悉以狀聞旣

畢使謁江陵上輔兵議江陵則以征伐自天子出其
如主幼何旣而以修薊功進左都督加秩少保兼太
子太保及江陵物人言波及公始移鎮南粵鹵入黑
峪開薊人願亟召還不得請則勒石頌功德尸祝之
公度嶺南任疆事如二鎮踰年疾作得謝還登州公
歲散千金徇客急歸而暴折卽延醫治病且無資丁
亥蜡日卒先是任子恩皆停僅襲祖職得指揮僉事
所著有紀効新書練兵實紀

明名臣言行錄卷第六十二

終

明名臣言行錄卷第六十三

太師高文襄公拱

字肅卿號中玄新鄭人嘉靖辛丑進士官至少師
吏部尚書中樞殿大學士卒年六十七贈太師謚
文襄

年十七魁其鄉辛丑成進士改翰林庶吉士授編修時
分宜華亭相傾公無所見厚薄裕邸出閣講學居外
府公爲講官先在開導王目屬而心儀之在府凡九
年陞太常寺卿管國子監祭酒事王賜金繒甚厚哽
咽不能別公雖去講幄府中事無大小必令中使往

問一日思先生甚親書懷賢二字遣中使賜至第無
何又書忠貞二字賜之又書啓發弘多四字賜之
壬戌陞禮部左侍郎兼學士知貢舉科場諸弊百五十
年所不能正者革之殆盡癸亥改吏部左侍郎兼學
士掌詹事府事時少宰缺公當往公曰吏曹事不令
兩侍郎知吾無以報上而徒以虛名鎮百僚無以爲
也竟辭不就

乙丑主考會試六月陞禮部尚書丙寅進文淵閣大學
士叅預機務未幾召入直閣臣入直西苑自世皇中
年始有事在直無事在閣世皇諭閣臣曰閣中政本

可輪一人往徐文貞竟不往曰不能離陛下也袁文
榮亦不往曰不能離陛下也公正色問文貞曰公元
老常直可矣不才與李郭兩公願日輪一人詣閣中
習故事文貞拂然不樂

世皇賓天華亭於袖中出草詔欲以遺命盡反先政公
謂語太峻與安陽公對案相向曰先帝英主四十五
年所行非盡不善也上親子非他人也三十登庸非
幼小也乃明於上前揚先帝之罪以示天下如先帝
何且醮事先帝幾欲止矣紫皇殿事誰爲之而皆爲
先帝罪乎土木之事一丈一尺皆彼父子視方畧而

盡爲先帝罪乎詭隨於生前而詆詈於身後吾不忍也相視淚下語稍聞外廷而忌者側目矣

穆宗登極議賞軍事公曰祖宗無此自正統元年始也先帝以親藩入繼時尚殷富遂倍之今第如正統事行則四百萬之中可省二百萬矣當事者竟如嘉靖事行而司農苦不支

大臣某者其人實有望不當擬去而首揆重違言者意乃以請揭上裁公曰此端不可開先帝歷多年通達國體故請上裁今上卽位甫數日安得遍知羣下賢否而使上自裁上或難於裁有所旁寄天下事去矣

乃竟請上裁兩人嫌益開言者爭謂公擅矣

言官劾公三十餘疏公力求去穆皇猶弗忍良久得請
賜馳驛遣行人護送又錫銀幣以歸越一載上念公
不置詔還內閣兼理吏部事公至慨然以天下爲已
任凡晨理閣事午視部事人謂公門無片楮公曰是
奚足哉大臣以體國爲忠以匡國事爲美區區小廉
細節耳寧足多乎往黜陟取辦倉卒不無紕繆公集
諸司官各授之策曰吏部職在知人人人不易知也幸
諸公早計之某也德德何如某也才才何如書諸冊
某也不德不德何如某也不才不才何如書諸冊某

也所自見某也得之何人書諸冊皆親封記之月終以復於予慎之哉予且以此見諸君賢每歲所得凡百八十餘冊以爲參驗以故賢否不淆黜陟允當

北鹵頻年入犯中外以兵事爲憂公曰大司馬安危所係至重也不得其人由儲之不豫少司馬止二員此無事時耳閱邊事未免假於他官或遇總督乏人未免移於他處假他官則非本職不便行事移他處則補於東缺於西彼此候代動經歲時不得履任門庭誰禦請於兵部增侍郎二員一遇巡閱卽以一人往邊方員缺卽以一人往凡邊方險隘鹵情緩急將領

賢否士馬強弱皆已曉暢方略素定遇大司馬員缺卽以補之如此而稱乏用必不然也兵乃專門之學儲養本兵大臣當自司屬始兵部司屬職在軍旅而不擇其人泛然以用又往往遷爲他用今宜特高其選而以有智謀才力者充之使其專官於此不復他選如邊方兵備卽以司屬往邊方撫臣卽以兵備往邊方總督卽以撫臣往而總督與在部侍郎時出時入以候尚書之缺如此而稱乏用必不然也邊方之臣又宜特示優厚使其功名常在人先他官不得與之論年月脫或不稱則律以法使其功名常在人後

如是而猶不盡力必不然也邊關總督之臣在邊日久著有成績當令回署以休暇之後不妨再出使其精神不疲而知慧不竭以勤王事爲濟必多得旨報可著爲令甲巳又上疏曰臣惟邊方有司有疆場之責才者猶懼不堪卽優禮而鼓舞之猶恐不振乃官其地者非雜流則遷謫待之旣薄志意隳沮又何望於展布蓋徒以地苦其人而曾不顧人之苦其地也徒以邊方爲遠而不知遠安然後邇安也請擇年力精強才氣超邁兼通武事者調用有能保惠困窮俾皆樂業者以三年爲率比內地超等陞遷有能捍患

禦敵者以軍功論不次擢用卽由此爲兵備爲巡撫
爲總督無不可惟以治效不以資格功名之路旣開
則凡有借口邊方以圖倖進者不可不爲一定之說
薊遼則昌平順義密雲懷柔薊州玉田豐潤遵化平
谷遷安撫寧昌黎樂亭延慶永寧保安安樂山西則
河曲臨縣忻州崞縣代州五臺繁峙定襄寧寧鄉岢
嵐嵐縣興縣靜樂保德大同懷仁渾源應州山陰朔
州馬邑蔚州廣靈廣昌靈丘陝西則固原靜寧隆德
安定會寧蘭州環縣安塞安定保安清澗綏德米脂
葭州吳堡神木府谷其他不得槩以邊稱得旨報可

時鹵甚警朝臣無經戰者人心震恐公乃以尚書陳希學曹邦輔侍郎王遴各率師背城列陣以待以京尹栗永祿南都御史護守山陵又起都御史劉燾於天津守通糧而以總督王崇古譚綸專征勦無內顧以侍郎戴才理餉是歲也鹵竟不入

霜降獄獄故事府部皆在冢宰當執筆至是大司寇意公閣臣不屑往公曰上命我視吏部部事皆我事也第須得情耳不至如往年問法司故牘唯唯耳於是秉燭視獄詞漏盡不休晝則集諸司議於朝房凡二十日往歲矜疑不越三四十人至是出冤獄一百三

十有九人內王金輩六人謂以硝黃損先帝聖躬以子殺父律置極典公驚曰豈有子爲天子而殺父之讐五年尚然在錄者乎先帝臨御四十五年享年六十終以正寢天下所共知今蒙以非命天下後世將謂之何遂上疏明其說有旨皆釋之

往大計時銓曹祇問籓臬爲黜陟公多所參伍或衆否獨留衆可獨黜其黜者必告以故無不惴服稱神明謂前此未有也已又策天下有司曰各地方有何賢才尚隱淪有何克頑尚梗正有何利當興何所沮而弗興何害當革何所畏而弗革皆得言之令封識以

告天下事皆在目中矣時天下重制科輕科貢公曰天下制科處其三科貢處其七是崇其三而棄其七也乃疏請惟賢是視不計科貢除吏時其善地多留而不除名曰養缺公曰民方無主吾何以留爲祇留以供用且以供人之用耳吾無所用又不供人用則何留焉於是命選司凡所有缺悉揭諸門外使衆見之故事推陞時皆主事揭授郎中呈於冢宰公曰堂有侍郎司有員外疏皆列名而事不與聞何居此不過欲行其私耳吾其改是令吏抱牘至後堂二侍郎同所屬揭之卽冢宰欲有所上下不能也鹽馬之官

暨遠方府守人皆薄視之以故善政無聞請以賢者
往不得復有低昂積穀遇貧薄之區則何以取盈完
糧當苦寒之地則何以足數於是特寬其額而官不
苦難教官暨驛遞閘壩等官本無民社而竟處以他
省遠方便有官者不能赴而去官者不得歸乃請得
選本省人皆稱便

貴州撫臣白土官安國亨叛逆當勦久而不克公復偵
知國亨非叛而巡撫者輕聽讒而倖功也乃以少卿
阮文中往受計行阮至貴得實如公言然徂於浮議
語多依違公復之書曰民彝異類順逆殊途稍有釁

隙當自處分不可過言於君父之前君父威在必伸
一有叛逆便當撲滅可但已乎事非其真過以言之
則將何以處也安國亨安智夷族自相讐殺何謂叛
逆而撫臣以告國亨禍不測且圖苟全有司不原其
情激而成變卽以爲叛逆之證可恨也國亨上疏乞
哀叛逆者若是耶有司仍以叛逆論之遂使朝廷欲
開釋而無由國亨欲投順而無路且智國亨讐也智
在省則國亨疑畏日深是挑之使鬪而增我多事也
愚謂國亨有罪而不可輕言叛逆安智當有安置而
不可省居時彼中號令未明國亨畏疑不肯赴理聲

言撫臣以勘誘我殺我乃擁兵自衛於是撫臣上疏
請兵糧爲征勦計公曰嘻誤矣國亨不出者疑畏深
也處以叛逆彼將叛逆自爲也彼羹苒耳族滅何爲
時在閣思之旋牀而走同官者曰公何旋牀走公曰
思貴州事耳從之則非計無從則失威今撫臣疏請
征勦而國亨亦奏辯吾意兩行之而以一科臣往勘
彼聞勘官且至以身旣在勘當不敢殺我我出聽理
乃可以自明而乃治其本罪亂或可戢也胥曰善公
召職方郎中至授意遂得請而以科臣賈三近往公
復面授方畧乃門亨聞科臣且來果喜曰我生矣吾

豈叛逆者哉語達京師先是阮約以五事而國亨母子狐疑不出至是乃將漢燹犯人王寬吳瓊阿第輩獻出而母子出就理輸銀四萬一千有奇抵罪蓋科臣未至而事已定矣

故黔國公沐朝弼旣謝事請入南京赴葬撫臣奏曰沐昌祚政事清明以致歲豐朝弼逼走昌祚不知所往請將朝弼錮南京毋令回鎮兵部來問計公曰誤矣雲南守巡故以挫沐爲丰采今又其故智耳領鎮之人衆所寓目而謂不知所往昌祚孺子耳安能感動天地朝弼安能爲惡如有罪朝廷以檻車逮之如之

何其賺之令歸耳後數日昌祚奏至請還其父且言撫按所奏誣也廷臣益信公神明

北鹵俺答孫把漢那吉來降邊報至中朝人心洶洶罔知所措公曰是奚足懼顧老酋其孫耳繼報者至曰酋婦甚愛其孫而老酋甚懼其婦泣欲得孫耳公曰鹵豢擁兵來索吾必殺之令退去鹵果退去公請加那吉指揮使賚以章服又語邊臣令盛其騶從騎馬街行使衆見之老酋初意中國殺之也乃聞不殺又加以官又美衣食騎馬街行大過望而又知不可得於是公請下令獻我叛人趙全等以贖其孫俺酋果

以計招全等全等皆中國人而爲鹵用居板升領衆
數萬所居左曰鳳閣右曰蟾宮門曰宣化墻屋皆繪
龍鳳往歲破城殺吏皆其爲也世皇懸重賞購之得
其一爵通侯然竟不可得公乃請許那吉歸又令邊
臣以緋袍金帶鶴蓋鼓吹送之又宣諭俺答曰那吉
是我中國臣若善視之老酋夫婦旣喜得孫而又見
其榮寵南向取胡帽叩首呼萬歲而封貢事之議起
矣公親詣射所面質全等全果驍駕異常次李自馨
者諸生也凡數十言不能了者全一言而畢公因問
鹵今歲不入故全曰鹵豈能不畏死哉偵是處有兵

是處有糧人有鬪志不敢入耳遂收獄盡磔於市全等碩其屬九人曰吾屬被擒邊事寧矣

鹵求封貢日懇而中朝疑畏日深動以宋人講和爲辭公曰天下之事以已求人機在人以人求已機在已宋人求和於鹵機在鹵故曰講今鹵求貢於我機在我直許之而已彼哓哓者豈爲國籌利害哉徒念重大恐有不效留爲後言耳乃請封俺答爲順義王其餘都督指揮千百戶有差而套鹵吉能等亦請願如例而三邊總督難之公擬旨切責復貽之書三邊宣大似難異同異同則宣大之市方開而三邊之擾如

故豈無俺答之人稱吉能而擾三邊者乎亦豈無吉能之人稱俺答而市宣大者乎是宣大有市而又擾也三邊苦擾而實市也同則兩利異則兩壞總督者議始協於是俺答進馬謝恩吉能亦附焉而西北沿邊一帶民狎其野穡人成功雖深夜獨行無誰何者矣於是公上疏曰嘉靖十九年北鹵遣使求貢不過貪賞賚與互市之利耳邊吏倉卒不知所策當事之臣憚于主計直却其請斬使絕之以致黠鹵怨憤擁衆大舉此往歲失計之明驗也今天祐國家請貢稱藩可以息境土之蹂踐可以免生靈之荼毒可以省

內帑之供億可以停士馬之調遣乘此閑暇修我邊
備若見寧息遂爾偷安則從此邊備寢弛卒然有變
將何以應是臣等謀國之忠反成誤國之罪矣請每
歲特遣才望大臣四出閱視以今視昔錢穀贏幾何
兵馬增幾何器械整幾何其他屯田鹽法以及諸事
拓廣幾何果有成績論武功爵若襲故常罪如失機
上嘉納之蓋今三十餘年而疆圉晏如也鹵旣貪我
財物鹵中婦女亦貪我繒帛惟恐罷市我得伸縮而
制之諸所爲貢市費者卽取諸曩日幕府出征之費
不及半耳鹵得我金錢非盡携以歸也我之羣商又

因而爲利而我數十年所全百萬之命所省百萬之費可按藉而求屈指而論也蓋漢人五餌之策公實川之矣

穆皇大漸召公入見而憑几執公手顧皇后言以天下累先生且復爲諭屬後事俄而上崩神廟登極公上言五事一謂御門聽政玉音親答以見政令出自主上二謂題奏繁文難以遍閱自有節要請先籤出以便省覽三謂事必面奏乃得盡情四謂大小章奏俱發內閣看詳若或未經發擬徑自內批者容臣等執奏五謂官民章疏當行當止未有留中之理得旨報

可而同事者遂以此用間翌日有旨逐公公自乘騾
車去道傍之人有流涕者公歸杜門謝客口不言時
事未幾而有王大臣之獄柄人將借以殺公已差五
校往新鄭有所逮會廷鞫之日白日晝暝廼大臣睽
目仰面備極拷畧竟不識所謂高公次日殺王大臣
而公獲免不敢復見一人矣六年卒於家祭葬止半
給又二十餘年值建儲大典嗣子務觀具疏上始得
贈謚廕一子尚寶司丞

少保趙文肅公貞吉

字孟靜號大洲四川內江人嘉靖乙未進士選庶
嘗累官文淵閣大學士兼掌都察院加太子太保
謚文肅

生而神穎年十五讀王文成傳習錄驚曰予固疑物理
之遠於本也今獲所歸矣白二親往從不許遂遍誦
六經自求之嘉靖戊子甫鄉薦走謁故相楊文忠里
第文忠稱曰是社稷器也明年下第歸丁內艱遂兼
修出世業父資政公強令赴試舉禮部廷對都御史
王公廷相撫其卷曰雖治安策弗能過也上嫌其語

直置二甲尋悔之乃首列庶吉士授編修

上初年銳意聖學後稍惑方術遂上求真儒贊大業疏
執政不懌謁告歸蜀爲多士發明大學致知本旨蜀
士知有問學出岫岬上者自公始也

遷右春坊右中允管國子司業事進諭六館士首揭中
庸性道教爲訓諸士聞之懽然舊習若濯而新

庚戌鹵薄郡城下嫚書求貢詔廷議公獨出大言曰城
下之盟春秋耻之且旣許貢則鹵必入城要索不已
卽內外夾攻何以禦之徐華亭曰足下必有奇畫公
曰爲今計請主上出御正殿下詔引咎錄周尚文之

功以勵邊帥釋沈束之獄以開言路輕損軍之令重
賞功之格飭文武百司共爲城守遣官宣諭諸將監
督力戰其他無可爲者上手詔嘉公壯猷陞左春坊
左諭德兼監察御史給賞功銀五萬令詣諸將營公
所至見諸軍涕泣奮諭以忠義獨宣府營未往還報
命曰營遠臣未辭朝未敢遠去上怒曰貞吉宣諭猶
賞未見處分如何卽復命且妄以未辭朝爲解下錦
衣鞫問廷杖之謫荔波典史

初公廷議罷盛氣直入苑中謁大學士嵩嵩辭不見公
怒叱門者會通政趙文華趨入顧謂曰公休矣天下

事當徐議之公愈怒罵曰汝權門太何知天下事嵩
大恨乃佯薦公以行時諸軍與鹵雜屯城外相去各
數百里公僦民車致金仇鸞所鸞不受鹵且漸引去
公計恐後時又恐仇鸞怒而誘鹵殺之故不敢遠去
宣府軍比復命遂得罪

累遷戶部右侍郎尋以忤嚴嵩罷穆宗卽位起吏部左
侍郎掌詹事府事兼經筵官尋遷南京禮部尚書上
悅之尋召入爲禮部尚書會文武邊臣建議欲招練
南兵十萬於張家灣公執不可曰曩南京建振武營
致大變今乃欲建十振武營於都城側哉况燕薊乃

戎馬場豈藉南兵當事者寤遂移練兵於薊鎮惟練南兵三千教烏銃識者謂爲得筭

隆慶三年命兼文淵閣大學士入閣視事面恩之日上諭盡心輔政公言近日朝綱邊防多廢壞臣欲捐身任事惟陛下主之上色益喜

與高公書曰大有之世匪彭無咎孔子曰明辨哲也夫哲人知幾知柔知剛知微知彰遜處雍容上信下從身安而國家可保又何必極其意之所之而後爲快哉又嘗語公曰數十年來人臣黨比成風共欺罔君上賄賂公行綱紀廢壞以致府庫空虛邊防廢壞人

才風俗彫弊已甚公振而新之在此時矣

鹵入大同邊臣棄城走爲巡按科道所叅而閣臣未有
言治罪者公謂宜炤元年山西失事例治之執政不
得已乃行巡按覆勘公爲是遂註籍不出上聞溫諭
乃上疏乞解贊輔重任退供講職且言大同之罪惟
祖法國是公論清議八字勘之足矣今兵部與閣臣
俱仍姑息臣欲爭論而力不能故懷慚思退上亟慰
留之

庚午上言遵祖制收兵權以飭戎務畧云我朝內外兵
分隸五府乃高皇帝定萬世太平計俾免前代權臣

握兵之害永樂末年因聚府兵北伐旋師後遂結營
團操乃以三千神機二營附之因號三大營其實皆
五府兵也正統末年變爲十團營弘治間又加爲十
二團營正德間又添置東西官廳然五營之號未泯
而五府意猶存也至嘉靖庚戌嚴嵩欲爲賊將仇鸞
地遂請特設戎政廳括內外兵籍鑄總督戎政印授
鸞夫以五府外而別立一廳則盡變太祖分府之意
以十餘萬衆而統於一人則盡變成祖分營之意向
使鸞誅晚則時事之危未可測也合無將見操官軍
九萬人分爲左右中前後五營各擇一將統之責令

開營教習仍以文臣巡覈之每歲春秋校閱凡將官
能否軍士勇怯技藝生熟皆得奏聞而賞罰行焉要
令五營齊成精銳有事則令勅將兵於閫外事畢則
納甲歸卒於營中如是則太阿之柄獨持於上而輦
轂下有數萬精兵隨所用而可矣上曰分營練兵乃
祖宗舊制遂下廷臣議行上特以公故重其事改協
理京營曰閱視然文武二臣世爵流官互相爭長公
所論卒不能行也

閣臣高拱兼掌吏部方欲挾權籠制諸臣意假公爲分
謗地故推公兼掌都察院加宮保已而本兵霍冀被

科臣楊鏊論劾疑公前議大同及巳乃於求退疏中
誣公主使公疏辨欲付法司究問以糾官邪且兩上
疏乞休上不允乃請給假回籍遷葬上罷冀留公如
故

陝西盜汪二等遁入四川境刼掠四川巡按御史王廷
瞻劾奏巡撫都御史嚴清縱寇殃民當罷貞吉言賊
故起鄖陝貽害川徼雖有鹵刼未甚挫衄遽爾更置
巡撫倘失事大此曷以加之清約以愛民省事任怨
蜀中旱荒流困正賴其勤廉安輯招徠便欲去之是
奪蜀民父母也臣竊見任事甚難論事甚易任事之

臣異同難一毀譽之口難調則常憂讒畏譏而論事之臣不設身以處地不原情以待成則恒深文而求備頃者都御史海瑞被論去位嚴清若復繼之臣恐建功立業之士從此懈矣臣蜀人也頗悉蜀事乞無罷清乃許調用

俺答孫把漢那吉來降朝廷受之御史葉夢熊論其不可上怒夢熊妄言降二級外調之次日下諭吏部科道官奸邪欺亂朕卽位以來者盡行考察貞吉上言近因御史葉夢熊論邊上千聖怒薄示之罰足戒百矣皇上卽位以來科道官在事人近二百豈無赤心

報國敢諫直言之士一概波及盡行考察誠恐所司奉行太過未免玉石俱焚仰惟聖德如天如地偶有所激降此嚴旨臣考漢唐宋事皆因鉤致黨人之罪遂致才俊銷磨國社空虛祖宗設立科道官許之風聞尚付執事諸臣酌其可否取自上裁縱或不當受罰而已未聞考察至二百餘人踵漢唐宋鉤黨之弊者也臣待罪內閣屢被譏彈今乃爲此營抹豈有要市實欲爲皇上尊顯聖名爲國家護養元氣爲天下愛惜人才耳且臣掌都察院事亦有考察諸臣之責與其調停營救於下孰若輸忠哀懇於皇上之前哉

疏上不允

吏科給事中韓楫者拱門生論公擢斥朝政暗邀人心
公疏辨乞歸令拱復還內閣毋再掌吏部樹私擅權
上手詔許致仕公精通內典好講黃石素書平生持
論謂二氏學通吾儒必出世乃可經世嘗道汴游嵩
高抱犢伏事諸山巡撫蔡汝楠逆而問學貞吉爲刻
圖明三教所繇起曰儒者見之謂之儒僊者見之謂
之僊佛者見之謂之佛擬述二通內篇曰經世通外
篇曰出世通使出世不忘經世之用經世不礙出世
之體未就而卒贈少保謚文肅

太師張文忠公居正

字叔大號太岳江陵人嘉靖丁未進士官至太師
建極殿大學士卒年五十七贈上柱國謚文忠萬
曆中削天啓時復

少穎敏絕倫十五爲諸生眇小而是時尚書顧璘撫楚
行部而試其文奇之已得召見復大奇之曰此兒國
器也遺以金錢爲膏油費明年舉於鄉謁謝璘解所
繫犀帶以贈而曰爲若異時圍腰飾然當且玉不足
久潤也自是又六年而登進士高第改翰林院庶吉
士諸進士多談詩爲古文以西京開元相砥礪而公

明倫彙編 家範典 卷之三
獨夷然不屑也與人多默默潛求國家典故與政務之要切者衷之而時時稱老易以爲能得其用諸老先生如徐階輩皆器重其人遂得授編修

遷國子司業公待諸生嚴亡所寬假而獨與祭酒高拱善相期以相業四十三年以諭德充裕王講讀王頗賢之未幾進翰林院侍讀學士領院事時華亭代分宜首輔盡以志事委公而其所具藁草輒爲輔臣袁煒所削及煒卒階乃復從公草進於上上意不懌亡遷賞然中外目屬公謂必大用矣

穆皇登極進吏部侍郎兼東閣大學士二年進少保公

上疏言六事一曰省議論凡事不貴無用之虛詞務求躬行之實效欲爲一事須審之於初及計慮已審卽斷而行之如唐憲宗之討淮蔡雖百方沮之而不爲搖欲用一人須慎之於始旣得其人則信而任之如魏文侯之用樂羊雖謗書盈篋而終不爲之動一曰振紀綱近年以來綱紀不肅猥以模稜兩可謂之調停以委曲遷就謂之善處伏望刑賞予奪一歸公道而不曲徇乎私情政教號令一斷宸衷而勿紛更於浮議一曰重詔令近日以來朝廷詔旨多格廢不行至十餘年未竟者文卷委積多致沉埋年月旣遠

事多失真遂使漏網終逃國有不申之法覆盆自苦人懷不白之冤是非何由而明賞罰何由而當伏乞勅下各司嚴立限期責令奏報違者查叅一日覈名實器必試而後知其利鈍馬必駕而後知其駑良今用人則不然或因一事之善而終身借之以爲資或以一動之差而衆口訾之以爲病加以官不久任事不責成更調太繁遷轉太驟資格太拘毀譽失實臣願皇上慎重名器愛惜爵賞用人必攷其終授人必求其當仍勅吏部嚴考課之法審名實之歸一曰固邦本今風俗侈靡官民服舍俱無定制外之豪強兼

併賦役不均花分詭寄偏累小民乞勅內外諸司悉心清理一曰飭武備今議者皆曰兵不多食不足將帥不得其人臣以爲此三者皆不足患也夫兵不患少而患弱今軍伍雖缺而糧具存若能按籍徵求清查冒占隨宜募補從實訓練何患無兵捐無用不急之費以撫養戰鬪之士何患無財懸重賞以勸有功寬文法以伸將權則忠勇之夫孰不思奮又何患於無將至於目前自守之策莫要於選擇邊吏團練鄉兵併守墩堡臣考前代及吾祖宗俱有大閱之禮以習武事而戒不虞今京師內外守備單弱伏乞勅戎

政大臣申嚴軍政設法訓練每歲農隙之時恭請大閱以試將帥之能否軍士之勇怯注意武備整飭戎事亦足以伐外寇之謀銷未萌之患疏入上褒諭下部院議行

六年春正月進少師五月上不豫己酉大漸召閣臣高拱及公高儀至乾清宮受顧命翼日上崩皇太子卽位年始十歲時太監馮保居中用事新鄭欲謀去之而公陰使人馳報保得預爲備遂以計逐拱而公裒然首輔矣

辛酉上御平臺召公慰勞之曰皇考屢稱先生忠臣公

頓首泣謝曰今國家要務惟在遵守舊制不必紛更
至於講學親賢愛民節用又君道所先乞聖明留意
上曰善遂賜酒饌銀幣公既柄政慨然以天下爲已
任中外想望丰采太約以尊主權課吏實信賞罰
號令萬里之外朝下而夕奉行如疾雷迅風無所不
披靡乃愉快於志嘗言高皇帝得聖之威者也世宗
能識其意是以高臥法宮之中朝委裘而不亂今上
世宗孫也奈何不法祖具詔草請於上召羣臣廷飭
之百僚惕然

時黔國公朝弼數犯法當逮而朝議皆難之以爲朝弼

綱紀之卒且萬人不易逮逮恐失諸彘心公擢用其子而馳單使縛之卒不敢動既至請於上貸其死而劍之南京人以爲快

漕河道公以歲賦往往迂緩逾春而後發卽水橫溢非決則涸乃采漕臣議督艘卒以孟冬月兌運及歲初而畢發發少罹水患其始農頗不便之久而習以爲常太倉粟至支十年歲與鹵互市饒馬則減太僕種馬而多令民以其價納民既樂於不擾價以時上太僕金亦積至四百餘萬又爲考成法以責吏治前是六部都察院有覆奏而行撫按勘者度事之不易行

或有所按覈或兩訐當質成者其人各以私軋則稽
緩之至數十年而不決遂廢寢公下所司以大小緩
急爲期限行之誤者抵罪自是一切不敢飾非政體
始肅

公進帝鑑圖說上見捧冊進喜動顏色遽起立命左右
展冊公從旁指陳大義上應如響因卽宣付史館賜
公銀幣一日上御文華殿講畢覽至漢文帝勞軍細
柳事公因言皇上當留意武備祖宗刀尖掙來的天
下却被今日筆尖兒壞了故俗語說文官把筆安天
下武將持刀定太平上稱善

公上言制勅宜尚簡嚴近來過爲誇侈臣諛其君猶謂之佞况以上諛下乎乞戒代言諸臣復古從實毋壞制體從之

萬曆元年冬十月上御文華殿公進講言及宋仁宗不喜珠飾上曰賢臣爲寶珠玉何益公曰明君貴五穀而賤珠玉五穀養人珠玉饑不可食寒不可衣上曰然宮人好治裝朕歲賜未嘗不節省公曰皇上言及此社稷生靈之福也上又曰秦始皇銷兵挺可傷人何銷兵爲公曰人君布德修政以結民心爲本天下之患每出所防之外秦亡於戍卒故天時不如地利

地利不如人和上曰然人定真能勝天也

四川西南都蠻平初隆慶時都蠻作亂公薦曾省吾往討之省吾有偉畧而四川總兵劉顯以在閩事被彈公曰臨敵易將兵家所忌倘蜀事不效當并閩事逮治之於是顯奮不顧身受省吾方畧以平蠻自効凡六越月諸寨悉平俘蠻長三十六人拓地四百里公進皇陵碑上覽畢謂公曰朕覽碑讀之數過不覺感傷欲泣公曰祖宗當日艱難蓋以天心爲心故能創制顯庸皇上以聖祖之心爲心乃能永保洪業因述聖祖微時事及卽位勤儉上愴然曰朕敢不黽勉法

祖然尚賴先生輔導也

遼東告警上深以爲憂公對曰暑月非北騎狂逞之時必無慮旣而薊遼總兵戚繼光報稱諸部解散無警公因上疏論邊事曰昨遼東撫臣張學顏報稱寇衆二十餘萬謀犯遼東前鋒已抵大寧皇上面諭臣臣已面奏料其無事今據總兵戚繼光報稱諸部解散無警臣又使人於宣府密偵西人青把都動靜則把都在巢駐牧未嘗東行遼東所報皆屬虛聲臣等因此反切憂慮夫兵家之要必知彼已審虛實而後可以待敵取勝今無端聽一訛言倉皇失措則是彼已

虛實茫然不知其與風聲鶴唳草木皆兵者何異敵情狡詐萬一彼常以虛聲恐我使我驚惶疲於奔命久之懈弛不備然後卒然而至措手不及是在彼反得先聲後實多方以誤之之策而在我顧犯不知彼已百戰百敗之道他日邊臣失事必由於此故臣等不以寇之不來爲喜而深以邊臣不知敵情爲慮也兵部以居中調度爲職猶貴審察機宜沉謀果斷乃能折衝樽俎坐而制勝今一聞奏報便爾張皇事已之後又寂無語徒使君父焦勞於上以憂四方豈僅以題覆公牘謂已畢本兵之事耶乞傳諭兵部詰以

寇情虛實之由使之知警并請賑各邊饑卒俱從之
嶺西羅旁平羅帝據山海間驚江急峽巖壑險絕諸猺
窟穴其中前代不入版籍國初甫一定之世宗朝諸
猺轉相寇掠不可撲滅督撫殷正茂旣討平惠潮寇
上疏言羅旁當誅廷議不能決公毅然言當誅舉兵
部尚書凌雲翼請賜璽書屬之討賊雲翼瀕行公謂
之曰雖鞭之長不及馬腹卽今兩廣諸猺雖所在都
有然乘間竊發要當審所緩急耳雲翼旣至部諸路
兵號三十萬八道並進克木衣山破諸峒五百六十
有四俘斬四萬二千有奇拓地數百里置郡縣

承平日久四方多草竊有司秘不以聞公特嚴其禁匿盜者雖循吏必黜得盜卽報決有司凜凜盜亦衰止例盜邊海錢米盈數皆斬首示衆然往往取長繫不能完至瘦死公獨亟斬之而追補其家屬文吏不習見祖宗制創聞以爲駭而不便者相率而爲怨讟公奮然身任之不恤也

令天下度田國初天下土田八百五十萬頃至後漸減歲久滋僞豪民有田不賦貧民曲輸爲累民窮逃亡故額頓減公請料田凡莊田屯田民田職田蕩地牧地皆就疆理無有隱奸其撓法者下詔切責之

七年二月河工成先是淮安有水患河決入淮淮勢不敵淮揚咸爲巨浸直逼泗州患近陵寢上以問公因上言故河道都御史潘季馴可使乃降璽書卽其家拜都御史使持節治河一切假以便宜久任帑藏不問出入諸奉行不及事者下詔獄鞠治之於是當事者日夜焦勞蓋踰年而堤成轉漕無患

三月上徵光祿寺十萬金公上言財賦有限費用無窮使積貯空虛不幸有四方水旱之災疆場意外之變可爲寒心此後望力加樽節若再徵金臣等不敢奉詔矣時上漸備六宮太倉所儲屢有宣進公上戶部

所進御覽錢糧數目請置之坐隅時賜省覽量入爲
出因言萬曆初年所入四百三十五萬有奇六年所
入僅三百五十五萬有奇則已少八十餘萬矣五年
歲出四百四十九萬有奇則已多四十餘萬矣夫歲
出則浮於前歲入則損於前此不可不留心也王制
量入爲出計三年之出必有一年之餘而後可况財
用止有此數設法巧取不能增多惟加意樽節則用
自足上嘉納之

五月封遼東總兵李成梁爲寧遠伯公言成梁屢立戰
功忠勇爲一時冠加以顯秩此鼓勵將士之法也已

而成梁使使餽以金公曰而主以百戰得功勲我受其金是得罪高皇帝也却不受

七月甲子給事中顧九思王道成等以江南水災請罷浙直織造內臣上以示公公奏民重困宜召還孫隆上曰彼織幣且完當俟來春耳公曰地方多一事則有一事之擾寬一分則受一分之惠災地疲民不堪催督暫去之俟稍稔可復也上從之時給事中李涑請卹江南水災并言四事上怒其譏訕公曰水災請卹亦言官之常雖或觸忤恐傷聖度上意乃解

八年十二月公請屬儒臣以累朝寶訓實錄分四本餘

則曰創業艱難曰勵精圖治曰勤學曰敬天曰法祖
曰保民曰謹祭祀曰崇孝敬曰端好尚曰慎起居曰
戒遊佚曰正宮闈曰教儲貳曰睦宗藩曰親賢臣曰
去奸邪曰納諫曰守法曰敬戒曰務實曰正紀綱曰
審官曰久任曰重守令曰馭近習曰待外戚曰重農
曰興教化曰明賞罰曰信詔令曰謹名分曰却貢獻
曰慎賞賚曰甘節儉曰慎刑獄曰褒功德曰屏異端
曰飭武備曰禦寇盜仍勅次第進呈俟明年開講其
諸司章奏切要者卽講畢面裁時上留意翰墨公以
爲筆札小技非君德治道所係故有是請上嘉納之

九年夏四月上御文華殿公以給事中傳作舟疏進覽云今江北淮鳳及江南蘇松連被災傷民多乏食至以樹皮充饑或相聚爲盜大有可憂上曰淮鳳頻年告災何也公對曰此地從來多荒少熟元末之亂皆起於此今當破格賑之上曰然公極言今有司負職如積穀一事屢旨申飭竟成虛文上作色曰有司忽民宜重處之公曰以後犯者當如聖諭又曰江南北旱河南風災畿內不雨勢將蠲賑惟皇上量入爲出加意樽節如宮費及服御可減者減之賞賚可裁者裁之至若施舍緇黃不如予吾赤子上曰然今宮費

俱節賞賚不溢公曰皇上謂從舊亦近例耳如今年暫行明年卽爲例非祖制也臣不敢遠引如皇祖用度最繁然內帑尚有餘積隆慶初庫貯尚百餘萬今歲入百二十萬猶稱乏惟皇上省察上是之

十年二月公上言安民之道在察其疾苦今尚有一事爲民害者帶徵稅糧也夫百姓財力有限一歲之入僅足供一歲不幸歲歉目前尚不能辨豈復有餘力更完累歲積逋乎有司避責往往將今年所徵抵完舊逋卽今歲所欠又爲將來帶徵矣况徵輸額緒繁多年分淆雜小民竭脂膏胥吏飽溪壑甚者不肖有

司因而漁獵夫與其股民以實奸貪之橐孰若盡蠲以施曠蕩之恩乞諭戶部覈萬曆七年以前積負悉行蠲免將見年正額責令盡完在百姓易辦在有司易徵是官民兩利也上從之詔下中外大悅

答王鑑川計貢市利害書今之議者皆謂講和示弱馬市啓釁夫所謂和者如漢之和親宋之獻納是制和者在而不在中國故賈誼以爲倒懸寇公不肯主議今則彼稱臣納款效順乞封制和者在中國而不在比之漢宋萬萬不侔獨可謂之通貢而不可謂之講和也且此事有五利焉鹵旣通貢邏騎自

稀邊鄙不聳稽人成功一利也防守有暇可以修復
屯田蓄吾士馬之力歲無調援可省行糧數十百萬
二利也土蠻吉能每借俺酋以爲聲勢俺酋旣服則
二酋不敢輕動東可以制土蠻西可以服吉能三利
也趙全等旣戮板升衆心已離我因與鹵約有願還
者必勿阻之彼旣無勾引之利而又知鹵之不足恃
則數萬之衆皆可漸次招來曹州之地可虛矣四利
也彼父子祖孫情乖意阻運將衰其兆已見老酋
死家族必分不死必有冒頓呼韓之變我因得其機
而行吾之計五利也凡此五利古之謀臣策士所爲

禱祀而求者也而今之議者獨以邊將不得搗巢家
丁不得趕馬計私家之害忘公室之利遂失此機曾
不爲國家審圖故僕以爲爲此言者不惟不忠蓋亦
不智甚矣至於桑土之防戒備之慮此是吾之常事
不容一日稍懈者豈以鹵之貢不貢而有加損乎
與王敬所論大政書僕今事幼主務兢兢守法愛養小
民與天下休息諸大擘畫必俟聖齡稍長睿明益開
乃可從容敷奏上請宸斷行之卽如宗室祿糧及西
北邊用書生爲將與處置屬彘之策皆國家大事急
宜經理者目前亦未敢言又未知他日可言之時僕

尚得立朝否耳嘗謂世廟以大有爲之君而當時諸臣不能佐下風徒取儀文制度紛更一番末以修立結局至經國遠猷太平鴻業固置而不講至今令人怏怏也

答河漕王敬所書辱示知運艘已於三月十一日盡數過淮無任忻慰聞渡江遇風諒無大損若前途通利則額賦可以畢達國儲日裕矣今計太倉之粟一千三百餘萬石可支五六年鄙意欲俟十年之上當別有處分今固未敢言也

答吳環洲論邊臣任事云上谷得公隱然如長城僕內

奉宸扈外憂邊境一日之內神遊九塞蓋不啻一再
至而已奈何邊臣故套難改鮮有爲國家忠慮者而
無識言官動卽諫白及與之論邊事一似說夢近有
一科臣聞遼虛報遂欲防守京城浚濠塹掘戰坑以
禦鹵者鹵在何處而張皇如是使人悶悶此疏若行
豈不遠駭聽聞取笑彞鹵已奏上留中寢之以泯其
迹

答薊遼總督書遼左數年雖頗有獲損失亦多薊門十
年以來一矢不驚軍民安堵較其績效孰少孰多而
論者於此則百計摧抑之於彼則多方掩護之昨該

鎮巡按遇鹵僅以身免若令薊門有此事則內外不知有多少劾疏矣而彼中方盛張功伐以掩其事巡按亦破胆結舌而不一言如此尚爲有公道乎公與薊門將帥但一一務實修守以爲戰備一切浮費繁文悉從簡革臺上戍卒無事不許擅離尺寸但能拒賊不入卽爲大功不必有所斬獲紛紛之議僕自爲之主持無事疑慮若空言無實一旦僨事則國法森嚴區區亦不能終庇之

答耿楚侗言致理安民云丈田賑饑驛傳諸議讀之再三心快然如有所獲蓋治理之道莫要於安民究觀

前代孰不以百姓安樂而阜康閭閻愁苦而危亂者
當嘉靖中年商賈在位貨財上流百姓嗷嗷莫必其
命比時景象曾有異於漢唐之末世乎幸賴祖宗德
澤深厚民心愛戴已久僅免危亡耳隆慶間仕路稍
清民始帖席而紀綱不振弊習尚存虛文日繁實惠
益寡天啓聖明雖在幼冲留心治理僕每思本朝立
國規模章程法度盡善盡美遠過漢唐至於宋之懦
弱牽制尤難並語今不必復有紛更惟仰法我高皇
帝懷保小民一念用以對越上帝奠安國本耳故自
受事以來凡朝夕之所入告教令之所敷布惓惓以

是爲務鋤強戮凶剔奸釐弊有不得已而用威者惟欲以安民而已

客戚南塘授擊土蠻之策前順義部下酋長密報土蠻入犯消息卽馳語薊遼軍門戒備數日以來警息沓至西酋所報不虛矣不穀料此賊必闖灤東今日之事但當以拒守爲主賊不得入卽爲上功薊門無事則足下之事已畢援遼非其所急也賊若得入則合諸路之兵堅壁以待之毋輕與戰我兵不動賊亦不敢開營散搶待之數日賊氣衰墮然後微示利以誘之乘其亂而擊之庶萬全而有功足下經營薊事十

年今乃得一當單于勉之勉之辱示以破鹵爲已任具見許國之忠但古之論戰者亦不全恃甲兵精銳尤貴將士輯和和則一可當百不和雖有衆弗能用也竊聞北人積憤於南兵久矣今見敵則必推之使先勝則欲分其功敗則必不相救是足下之士能戰者無幾耳足下宜深思之部署諸將宜令食多而養厚者當先毋以失職怨望者當劇處士卒毋分南北一體煦育而拊循之與最下同甘苦務使指臂相使萬衆一心知愛護主將如衛頭目則不待兩軍相遇而決勝之機在我矣

公性深沉機警多智數及登首輔慨然有任天下之志
勸上力行祖宗法度上亦悉心聽納十年來海內肅
清用李成梁戚繼光委以北邊攘地千里荒外讐服
南蠻累世負固者次第遣將削平之力籌富國太倉
粟可支十年問寺積金至四百餘萬成君德抑近倖
嚴考成覈名實清郵傳核地畝一時治績炳然惜其
福衷多忌剛愎自用初入政府卽以私憾廢遼王殺
洪朝選逐高拱戍劉臺以魏科私其子又以奪情諫
諍杖吳中行趙用賢艾穆沈思孝鄒元標爲時論不
滿云曾孫同敞以廕補中書舍人庚寅冬十一月大

死而不屈而死

明名臣言行錄卷第六十四

左都御史葛端肅公守禮

字與立號與川濟南德平人嘉靖己丑進士累官都察院左都御史贈太子太保謚端肅

授彰德府推官有大獄坐與盜者連數郡公憫無驗悉論出之大吏易公儒生耳何知吏已更以他疑獄試公公平亭盡允大驚服

擢兵部主事改禮部儀制郎寧府既除弋陽王攝寧事請得置旗尉如故守禮不與曰攝寧也繼寧耶出爲河南提學副使論士兼德藝遷山西參政冀南兩郡

藩宗暴橫至匿亡命行劫監司莫誰何有從署於他
治者守禮至仍故部署彈壓兩郡悍宗皆斂跡陞山
西按察使鴈代寧府間居民多自墾田或告晉王曰
府中牧地也王奪之居民譁譟構兵守禮法其首難
者仍歸田於民令有司歲收其田租抵宗祿陞陝西
右布政轉左秦王亦以牧地故利民田立石其壘上
民爭訟不決守禮仆壘石告王以晉事田亦復歸民
入覲佐計藏吏奏羨金爲裝公叱不內吏白此故事也
卽公不內後人亦常有之公怒曰爾安知後人非賢
者籍而置之帑天官課郡國治狀陝部小吏有署老

疾當罷者公爲請留尚書曰計簿出自籒伯何自忘也公曰此邊吏去省遠徒取文書登簿今見其人方知誤註過在布政何可使小吏受枉尚書驚服曰誰能於吏部堂上自實過誤卽此可爲賢能第一矣

陞副都御史巡撫河南陞戶部右侍郎改吏部右侍郎三攝部事大抵綜名實振淹滯抑僥倖銓法多所更定而貴勢皆不便之而公以是南遷罷矣

隆慶改元起刑部尚書改都察院左都御史是爲萬曆初年再察中外察務絕朋比黜愴壬一歸於平直而尤重貪殘之禁守令坐受財及酷烈者劾繫詔獄窮

治吏爭自祓濯矣

華亭新鄭搆卻舉朝奏排新鄭獨公無疏又拂華亭及
新鄭再相修怨華亭正欲戍其子弟公又從中主持
得從報寢新鄭固已嫌公第念其德厚忍未有以發
也及新鄭坐王大臣事公又與楊博力周旋於張居
正所人以此稱公長者

公立朝四十餘年侃侃一節義所不可引是非爭大體
絕不伺他人意指有附麗而亦未嘗自便爲隱情自
少至老服儉如一日不知有人世彫靡年五十時其
夫人爲求侍姬而強之公召姬侍姬直當前公卽拂

衣出旣數年夫人召其姬家返之猶處女也嘗上疏
禁戲劇東省讌新進士御史用故事召戲不敢白公
以告相殷士儋士儋東人也公面斥御史士儋曰某
實命御史公曰某疏禁安所得旨旨實內閣所票公
自矛盾耶揮出之卒賜祭葬贈太子太保謚端肅孫
曦亦萬曆中舉山東第一成進士

尚書毛端簡公愷

字達和號介川衢州江山人嘉靖壬辰進士仕至
刑部尚書謚端簡

少從伯父鎮安君學鎮安大奇之曰茲見穎悟異常吾
不能爲若師遣從閩省解元張公燮游遂盡得其易
學之傳下筆英發遒勁頃刻數千語立就嘉靖辛卯
壬辰聯捷衆以爲賀公歔然曰昔王沂公志不在溫
飽余之志豈在一第哉因賦詩見志移病歸屏居萬
山中益肆力問學凡經濟時務咸究竟而得其要
乙未赴廷試明年授行人已亥授監察御史上覈名實

以隆治道疏皆係國家大政莊敬太子立疏留鄒公
守益輔導忤執政謫寧國府推官公無愠色孽孽訊
鞫惟冤抑是伸生道是求每兩造具備片言質成健
訟者望公色縮舌不能出一詞亦有赴郡庭中道而
反者旁郡民求直於上官輒云欲得毛青天毛青天
云

壬寅陞南工部營繕司主事抽稅蕪湖開闢當荆湖下
流船艦相銜商稅不貲往往不克自潔公獨勵清操
出納委之縣佐稅銀貯之縣庫揭揭平一毫不染也
其歲額之盈者則蠲以與商商人咸頌之曰古所謂

冰蘖其清者非毛公一人耶

甲辰丁外艱歸戊申補刑部郎中次年陞瑞州知府瑞俗素闇訟且多積逋公躬率以禮義而申之禁令怙終不馴者始繩之以法積逋所追必寬其期限度貧甚者則以俸餘代爲之償民感激歡呼若更生辛亥調寧國復丁內艱歸甲寅起補山東萊州府卽轉天津兵備副使天津爲京師左輔密邇輦轂中貴人多有所請囑公獨持風裁凜然不少假借而中貴人不敢犯其所設施如精簡閱飭戎備廣屯種足兵食勦鹽徒捕奸究修堤堰而革驛遞之騷擾裁無名之支

以名臣言行錄卷之四
應凡有德於軍民者甚多

三載陞山西右叅政山西土瘠民貧積歲之逋至不可勝詰公曰民之貧猶皮之盡也毛將安傅乎乃躬行州里撫循而訓諭之公以誠感民以誠應自是山西鮮有風逋者

三載陞河南按察使尋轉右布政未幾命巡撫保定公自河南而之真定也適值饑歲流離載道車至不能行公先出所持俸餘以賑其急民歡聲如雷且感且泣公與之約曰吾蒞任當請於上以拯若輩旣而懇疏陳乞蠲免仍分別存留起解以次帶徵計其所活

不啻萬人公之功大矣

時鹵情洶洶不測公至克詰戎兵振揚紀律留選達軍以壯其威分調客兵以阨其險自是邊關振肅醜鹵遠遁秋防竣事奉勅嘉獎有白金文幣之賜

壬戌擢副都總督漕運兼巡撫鳳陽等處既至任選士兵以密防汎省調發以節餽餉定期限以酌催攢緩折兌以賑貧窮諸所注措皆老成經國遠慮而條陳兵食事宜一疏則尤切時務世宗嘉之癸亥擢左副都召回協管院事乙丑陞刑部右侍郎更改吏部右丙寅轉本部左代冢宰攝部事獨持公正以抑奔競

慎選舉諸凡請托一切謝絕仕路爲之肅清

穆宗嗣位特改公刑部尚書戊辰七月抵任嚴飭邦禁
慎讞刑獄中貴不法則抗疏極論請發部問擬以彰
公道其有以過誤繫獄者亦爲之疏請明示犯由以
昭勸懲益不欲妄隨人主喜怒以低昂其間至於因
盛暑而恤淹滯遇災變而請停刑古所謂式敬由獄
以長王國者公之謂也上方眷注公而公乞休章六
七上始得允庚午春特賜馳驛歸前數月而逝
公天性剛介操履嚴毅雖落落難近而實樂易可親雖
容貌清癯不踰中人而擔當負荷招不來麾不去則

毅然賁育莫奪也性喜講學如論性則窮理氣之奧
論學則別頓漸之門至於躬行實踐則一以養心寡
慾爲主每事必求慊於心不慊於心弗爲也歷任四
十餘年始終皜然一節其爲完人可知矣

尚書吳介肅公嶽

字汝喬山東汶上人嘉靖壬辰進士官至南吏部尚書卒謚介肅

歷戶部主事郎中知廬州保定二府爲郡責大體而已而以聖賢之道望其民守廬州諭廬民毋有不孝弟毋怙侈毋鬪狠毋惡聲聞里中毋崇尚浮屠婦女不蔽面毋途行別民善惡於旌善申明二亭置社倉設社學藥局鄉約朔望視學講經義一如國家成法廬人民化之守保定仁愛明敏未嘗用意摘發而自胥吏隸卒以至市猾田吐無敢越軌皆若通貫爲一心

保定繼來爲守者唯有嚴清與公並名而公德及民尤深且厚

爲人耿介端方清操絕俗主事督上谷餉積羨千金吏以送納正色拒曰美金卽正餉也或以爲利吾甚耻之山澤之稅及吏役班值舊供府堂悉罷却之用代厨傳人以爲難保定在輦轂下一時徵發四出民不能應公具疏奏裁免十六七諸郡以寬

選左僉都御史巡撫保定嘉靖末年見相嵩虐焰移疾自免屏居南旺湖上茅屋薄田粗堪居食惟披閱禪經默坐一室客有過者亦時出見或設留食不過脯

菜又不出謁謝有時遊行跨蹇驢而已或諷其矯公
曰某罷吏居家未嘗用邑中夫役自覓輿夫力又不
能老又不能騎跨蹇驢取便適非敢矯也

徐華亭當國起公右副都御史協理院事郵遽持檄喧
闕公宅僕人言狀公方趺坐行氣搖首且止僕走立
門外可炷香頃乃下床索檄觀之擲不更視親友從
臾乃出就徵一時士論翕然得人

隆慶初內計科臣有異議疏入留中公詣政府抗辭曰
請閣下視故事有考察去官者而科臣敢留之否公
毋傷國體也閣臣悚然疏尋下既遷南京吏部尚書

以老致仕公在南京抑浮薄杜僥倖務節儉風俗爲之一變

守廬州日時南氓王公廷守蘇一日以公務會於鎮江公折柬徵王公爲金山之遊載酒一瓶米數合肉斤許蔬一束於舟中屏騶從趣王公同舟而往王公熟視其具笑曰兄昨折簡相招將爲主筵欸我也其具止是耶公曰足吾兩人用可矣多具何爲比至公命庖丁卽所載酒肉蔬米治具相與論心話舊或趺坐磯頭或倚徙水際竟日而還無何以艱歸途次陰雨持廬蓋以行至家返之歸自南都廳事不備假僧寮

而見客卒賜祭葬謚介肅

侍郎鄭恭介公世威

字中孚號環浦福州府長樂人嘉靖己丑進士官
至刑部右侍郎

方總帥題其齋曰志樂顏瓢貧甘范甌弱冠舉於鄉既
成進士會臺臣闕詔從諸進士推擇衆競趨之公曰
纔脫章句躡司耳目耶授戶部郎丁艱改刑部出爲
廣西按察僉事尋改廣東丁內艱復除江西貴溪相
言再召入相諸司往賀開角門延入公便却退呼闈
者曰相國尊然奈何令邦大夫縮縮旁趨還吾刺去
耳門者開中門乃入

夏相言無子汪巡撫玄錫偕相有事上清宮名爲祝釐
公從諸司往拜視祝詞乃知爲相祈子拂然不拜出
轉浙江布政參議言再相過武林公復不與諸司郊
迓也轉江西按察副使時分宜代言柄國勢張甚族
黨號豪所司不敢問公輒三尺繩之有抵重法者獄
具矣傅巡撫某憾於嚴將改論公持之堅不能奪熊
憲副輯者嚴姻也以輕直占廢寺田千餘畝會歲稔
公估平直鬻田賑饑熊持嚴手書來冀減直公不爲
動竟以成案報凡公所爲撓分宜多此類辛亥遷蜀
叅政公念分宜父子終螫已遂投劾歸

分宜敗中外交薦起南通政隆慶改元擢僉內臺晉爲副華亭相階爲王守仁學廷議有舉守仁從祀者公言王守仁治世能臣也謂其紹周程宗孔孟則平生庸德有不足矣且其率天下趨徑直行使聖門講學明理之功屏不用將有毫釐差千里失者與守仁同時講學者泰和羅欽順惠安張岳世稱賢大夫兩相指擊其謬守仁辨不能紬蓋守仁以名勝欽順岳以實勝實之與名相去遠矣階不是也顧其事亦寢戊辰入爲少司寇會有詔採珠及珍石公疏納忠諫崇節儉不報遂乞骸骨歸歸而耕鋤如故里中不知有

侍郎云客有謁公者遇公田間授公刺云爲我通主人翁公諾而入頃之衣冠肅客卽向遇諸田間者也主客相視而笑公歲時不一至郡邑長吏居數歲遷去多以不得見公爲恨而公亦非故爲苦節約名其天性固爾

副使江西時議清贖緩備庾賑且謂肺石而徵之筐篚而糜之是好國法也取盈於公府而尾閭於權門是奪民命也經經千言讀之惻切至有鍤以傳者通籍數十年朝野參半自對大僚臨下吏與農民處一本之至誠其學一以濂洛爲宗取六籍及儒先語日誦

繹之錄其精者獨証於心年八十二卒禮官言其歷
官權貴之鄉媚寵是耻辭榮寂寞之野杜門自高人
謂盡之賜祭葬贈尚書

尚書曹公邦輔

字子忠定陶人嘉靖壬辰進士官至南京戶部尚書卒年七十

歷知元城南和二縣治在廉平裁省與民休息擢雲南道監察御史巡視河東鹽政釐革爲多課溢常額出按陝西會鹵入延綏殺擄甚衆邊臣匿不以聞公卽上疏奏逮大將以下七人咸論如法秦宗人有殺人獄數年不決一訊而服奏正憲典

出爲河南副使大盜師尚詔流剽兩河奏詔捕治一日寇至監司錯愕或走伏匿公親率吏士提刀躍馬馳

入賊壁衆皆賈勇向賊一以當百賊懾而潰遂破走之

再擢浙江按察使倭彘入寇特拜右僉都御史巡撫應天將兵禦寇追奔逐北前後斬酋首六百餘級會趙文華視師求賄不得反構蜚語論劾謫戍朔州吳人感其功德立祠俎豆之

隆慶改元起爲左副都御史協理院事遷兵部左右侍郎總督薊遼軍務擢南京都察院右都御史遷戶部尚書考績詣闕以年滿七十疏請致仕公爲人忠孝耿直志在殉國不避彘險登仕四十年苦節清操始

終如一田產蕭然不異寒士嘗欲以身死封疆爲朝廷掃清朔漠不究其施世以爲恨卒賜祭葬如制今祀學宮

公好延攬義士收置幕下如吾崑諸生陳淮於倭寇犯蘇日統兵力戰後援不繼沒於靈巖山之木瀆前其子應期方周歲後登賢書籲天請卹奉旨特祠於鄉邑人私謚曰忠烈

尚書譚莊懿公太初

字宗元始興人嘉靖戊戌進士官至南工部尚書
卒年七十五

生而穎異十歲爲郡諸生督學魏校深奇之嘉靖丁酉
應貢復領鄉書以貢資還公帑或以爲矯止之公曰
受此自心不慊豈矯乎連登進士出跨寒驢人笑之
弗顧也

選授工部主事痛革積弊不遺餘力久之復以憂去起
補戶部選爲戶科給事中歷兵刑左右給事奉使冊
封餽遺一無所受擢江西按察副使獨振風紀直民

枉抑視權勢藐如也清戎多所開豁御史以失額爲疑公曰失額罪小殃民罪大理驛傳嚴革冒濫撫院或借資庇其故人亦峻拒之過者多避道去嚴嵩親黨屢奪人產公廉得實悉麗法秩滿年僅五十具疏乞休不許

擢廣西叅政桂林澇米價湧請督府開倉發糴便宜賑恤存活以十餘萬在事二年值妻子連喪疏乞解職嘉靖末年召起河南右叅政連擢南京通政應天府尹三奉詔書不敢復辭穆宗卽位疏乞以叅政致仕不許

晉工部侍郎遷戶部右侍郎總督倉場貴戚權璫侵民
田土必躬履悉歸侵於民力薦僉都御史海瑞可
大用累乞休不許轉南京戶部尚書復引疾乞休致
仕家居田不滿百畝讀書鼓琴時人罕見其面閩人
戶部尚書馬森謂生平所見清節二人粵中譚太初
及汶上吳嶽也子音以貢歷上石西州知州有廉直
聲

尚書劉公體乾

字子元北直東安人嘉靖甲辰進士官至戶部尚書

授行人改兵科給事中時司禮太監鮑忠死其黨李慶爲其姪鮑恩等請乞陞級八人收勇士營五十人世宗已許之公疏論曰太祖舊制武職非有軍功毋得陞授鮑忠生膺榮寵沒叨卹典且官其姪恩等爲錦衣衛指揮未有寸功若如所請是使胥徒雜還於青紫廝隸混淆於冠裳壞祖制而滋倖門非聖世所宜有也帝是之遂詔裁減

三十年轉左給事中帝以財用告絀詔廷臣集議或請
追宿逋或請增賦額公獨抗疏曰近日邊事日棘軍
儲匱乏諸臣計非得已但聞蘇軾有言豐財之道當
去其害財者則革冗吏清冗費是也我朝成化五年
武職已逾八萬合文職蓋十萬餘今邊功之陞授勲
貴之傳請及各衙門之添設大臣之恩蔭豈止十數
萬加以宦官錦衣衛各監局勇士匠人之屬歲增日
益不可悉數所以糜爛財賦者不少乞勅大小衙門
一切日濫逐一查革可省俸祿無筭所謂革冗吏者
此也又聞嘉靖元年至十五年光祿寺積剩銀不下

八十萬以後供用日增類多內官乾沒其他供應衙門那移侵盜尤多乞勅禮部詳酌著爲令典年終遣科道官核銷所謂革冗費者此也二冗旣除所省不貲民生不擾國計自裕疏入留中

隆慶元年歷戶部左侍郎總督倉場逾歲陞南京戶部尚書疏查江楚諸省積逋銀米絹布合計二百餘萬請命清核又條議鳳陽倉糧六事皆務使出入有稽利無中飽爲國家理財本計

三年改戶部尚書上諭取太倉銀三十萬兩進用公言銀庫見存止三百七十萬九邊年例該發二百七十

六萬有奇在京庫糧商價百餘萬而薊州大同各鎮
例外奏討不與焉卽盡發庫銀猶不足用若復取三
十萬則經費何支伏乞且停止上不允公復奏此存
庫之數乃近差御史搜括所入明歲則無策矣萬一
變起倉卒臣不足惜如國事何于是戶科給事中李
已等御史傅孟春等交章乞如公言乃命止取十萬
兩

疏請太和山香祝乞命有司董之毋預內臣不聽明年
上諭內臣以空劄取部銀十萬公言京帑重寄以片
楮取之不名不印真偽奚辨帝命如數以進

上問九邊年例軍餉太倉歲發及各省解納之數公言
院守士馬各鎮原自有主兵一鎮之兵足以守一鎮
之地後主兵不可守增以募兵募兵不已增以客兵
調集多於往時而坐食者衆矣合用芻糧各鎮原自
有屯田一軍之田足以贍一軍之用後屯糧不足加
以民糧民糧不足加以鹽糧鹽糧不足加以京運饋
餉溢於常額而橫費者甚矣因以元年至三年太倉
及各省歲發兵餉與本鎮屯糧之數備呈上覽

公所請皆爲國家惜浮費而內供日益侈又出中旨取
買真珠黃綠玉諸物公執不行帝怒予閒住神宗卽

位復起爲南大司馬萬曆二年六月致仕卒於家
公性惇謹儼言正氣務存大體爲計臣恥言聚歛歸本
於節用事所不可雖臨以天威終不肯徇也人咸謂
有古大臣風